

四庫全書

子部

欽定四庫全書

文房四譜卷二

宋 蘇易簡 撰

筆譜下

五之辭賦

蔡邕筆賦

序曰昔蒼頡創業翰墨作用書契興焉夫制作上聖則
憲者莫先於筆詳原其所由究察其成功鑠乎煥乎弗
可尚矣賦曰

惟其翰之所生生於季冬之狡兔性精亟而慄悍體迢
迅而騁步削文竹以為管加漆絲之纏束形調搏以直
端染玄墨以定色畫乾坤之陰陽讚宏義之洪勛盡五
帝之休德揚蕩蕩之明文紀三王之功伐兮表八百之
肆覲傳六經而綴百氏兮建皇極而序彞倫綜人倫於
晻昧兮贊幽冥於神明象類多喻靡施不協上剛下柔
乾坤位也新故代謝四時次也圓和正直規矩極也玄
首黃管天地色也

云

晉傅玄筆賦

簡脩毫之奇兔撰珍皮之上翰濯之以清水芬之以幽
蘭嘉竹挺翠彤管含丹於是班匠竭力良工逞術纏以
素帛納以玄漆豐約得中不文不質爾乃染芳松之淳
烟兮寫文象於紈素動應手以從心兮煥光流而星布
柔不絲屈剛不玉折鋒鏑淋漓芒跼鍼列

傅玄筆銘曰

韡韡彤管冉冉輕翰正色玄墨銘心寫言光讚天人深

厲未然君子世之無攻異端

傅玄鷹兔賦云

兔謂鷹曰毋害於物有益於世華髦被體彤管以制蒼
頡創業以興書契仲尼賴之定此文藝擬則天地圖畫
萬方經理羣品宣綜陰陽內敷七政班序明堂道運玄
昧非筆不光三皇德孔非筆不章

梁簡文詠筆格詩

英華表玉筴佳麗稱珠網無如茲制奇雕飾襍衆象仰

出寫含花橫插學仙掌幸因提拾用遂廁璇臺賞

梁徐摛詠筆詩

本自靈山出名因瑞草傳纖端奉積潤弱質散芳烟直
寫飛蓬葉橫承落絮篇一蓬掌握重寧憶仲升捐

晉郭璞筆讚

上古結繩易以書契經緯天地錯綜羣藝日用不知功
蓋萬世

後漢李尤筆銘

筆之強志庶事分別七術雖衆猶可解說口無擇言駟
不及舌筆之過誤愆尤不減

梁庾肩吾謝齊銅硯筆格啓

烟磨青石以踐孔氏之壇管挿銅龍還笑王生之壁西
域胡人用織成之絳簞游仙童子隱芙蓉之行陣莫不
盡出梁園來頌狹室

嵇含試筆賦序

騁韓盧遂狡兔日未移晷一縱雙獲李秋之月毫鋒甚

偉遂刊懸崖之竹而為筆因而為賦

賈耽虞書歌

衆書之中虞書巧體法自然歸大道不同懷素只攻顛
豈類張芝惟札草形勢素肌骨老父子君臣相揖抱
孤青似竹更颼颼濶白如波長漂渺能方正不隳倒功
夫未至難尋與須知孔子廟堂碑便是青紺中至寶

成公綏字子安棄故筆賦

序曰治世之功莫尚於筆筆者畢也能畢舉萬物之形

序自然之情也力未盡而棄之糞掃有似古賢之不過於是收取洗而棄之用其力而殘其身焉

有蒼頡之竒生列四目而魚明慕羲氏之畫卦載萬物於五行乃發慮於書契採秋毫之穎芒加膠漆之綢繆結三束而五重建犀角之玄管屬象齒於纖鋒染青松之微烟著不泯之永蹤則象神仙人皇九頭式範羣生異體怪軀注玉度於七經訓河洛之識緯書日月之所躔別列宿之舍次乃皆是筆之勛人日用而不寤迄

盡力於萬鈞卒見棄於衢路

唐張碧答張郎中分寄翰林貢餘筆歌

圓金五寸輕錯刀
天人摘落霜兔毛
我之宗兄掌文檄
翰林分與神仙毫
東風吹柳作金線
狂湧辭波力生健
此時捧得江文通
五色光從掌中見
江龍角嫩無精彩
晝日揮空射烟靄
誰能邀得懷素來
晴明書破琉璃海
揚雄得之甘泉賦
胸中白鳳無因飛
他年擬把補造化
穿江入海剡天涯
昨宵夢見歐率更
先來醉我黃金觥

手擎瑟瑟三十斗博歸天上書黃庭夢中擺手不相許
悵望空剩碧雲去

梁吳均筆格賦

幽山之桂樹恒縈風而抱霧葉委鬱而陸離根縱橫而
盤互爾其負霜含液枝翠心赤翦其匡條為此筆格趺
則岵岵方爽似華山之孤上管則員員峻逸若九
疑之爭出長對坐以銜烟永臨窻而儲筆

梁元帝謝宣賜白牙鏤管啟

春坊漆管曲降深恩北宮象牙猥蒙霑逮雕鐫精巧似
遼東之仙物寫圖奇麗笑蜀郡之儒生故知嵇賦非工
王銘未善昔伯喈致贈才屬友人葛龔所酬止聞通議
豈若遠降鴻慈曲覃庸陋方當琉璃無當隨珠過侈但
有羨卜商無因則削徒懷曹植恒願執鞭

白樂天雞距筆賦

足之健者有雞足毛之勁者有兔毛就足之中奮發者
利距在毛之內秀出者長毫合為手筆正得其要象彼

足距曲盡其妙圓而直始造意於蒙恬利而銛終騁能
於逸少斯則創因智士製在良工拔毫為鋒截竹為筒
視其端若武安君之頭小窺其管如元玄氏之心空豈
不以中山之明視勁而迅汝陰之翰音勇而雄一毛不
成採衆毫於三穴之內四者可棄取銳武於五德之中
雙美是合兩揆相同故不得兔毛無以成起草之用不
名雞距無以表入木之功及夫親手澤隨指顧秉以律
動以度染松烟之墨灑鵝毛之素莫不畫為屈鐵點成

垂露若用之戰陣則催敵而先鳴若用之草聖則擅場而獨步察所以稽其故雖云任物以用長亦在假名而善喻向使但隨物棄不與人遇則距畜縮於晨雞毫摧殘於寒兔安得取名於彼移用在茲映赤管狀紺趾乍舉對紅箋疑錦臆初披輟翰停毫既象乎翹足就棲之夕揮芒拂銳又似乎奮拳引闕之時苟名實之副者信動靜而似之其用不困其美無儔因草為號者質陋折蒲而書者體柔彼皆瑣細此實殊尤是以搦之而變成

金距書之而化出銀鉤夫然則董狐操可以勒為良史
宣尼握可以削定春秋夫其不象雞之羽者鄙其輕薄
不取雞之冠者惡其柔弱斯距也如劍如戟可擊可搏
將為我之毫芒必假爾之鋒鏑遂使見之者書狂發秉
之者筆力作挫萬物而人文成草八行而鳥跡落縹囊
或處類藏錐之沉潛團扇忽書同舞鏡之揮霍儒有學
書臨水負笈辭山含毫既至握管未還過兔園而易感
望雞樹以難攀願爭雄於爪距之下冀得雋於筆硯之

問

寶紉五色筆賦

物有聲奇文抽藻思含五采而可寶煥六書而增媚豈
不以潤色形容昭宣夢寐漬毫端之一勺潛合水章施
墨妙於八行宛成錦字言念伊人光輝發身拳然手受
灼若迷真戴帛驚纈文漸出臨池訝蓮綵長新效用辭
林驚宿鳥之丹羽呈功學海間游魚之彩鱗所以成盡
識之規得和光之道輕肆力於垂露觀流精於起草俾

題橋之處轉稱書虹當進牘之時尤宜奮藻掌握攸重
文章可驚糝松烟以霞駁操竹簡而淚凝倘使書紳黼
黻之容斯美如今畫像丹青之妙足徵卓爾無雙斑然
不一搗握彩以冥契刷孤峯而秀出紛色絲兮宜映練
囊暈科斗兮似開紺帙動人文之際懷豹變於良宵呈
鳥跡之前想鳥凝於瑞日當其色授之初念忘形而獲
諸魂交之次驚亂目之相於將發揮於拳石幾遷染於
尺書秉翰苑之間媚花陰而蔚矣耕晴田之上臨玉德

以溫如是知潛應丹誠暗彰吉夢嘉不亂之如削意相
宣而載弄混青蠅之點取類華蟲迷皓鶴之書思齊彩
鳳故可以彰施薤葉點綴桃花舒彩牋而增麗耀彤管
而孔嘉彼雕翠羽而示功鏤文犀而窮奢曾不如披藻
翰而發光華

僧貫休詠筆詩

莫訝書紳苦功成在一毫自從蒙管錄便覺用心勞手
點時難棄身閒架亦高何妨成五色永願助風騷

白樂天紫毫筆樂府詞

紫毫筆尖如錐分利如刀江南石上有老兔喫竹飲泉
生紫毫宣城工人採為筆千萬毛中揀一毫毫雖輕功
甚重管勒工名稱歲貢君兮臣兮勿輕用勿輕用將何
如願賜東西府御史願頌左右臺起居搦管趨入黃金
殿袖毫立在白玉除臣有奸邪正衙奏君有動言直筆
書起居郎侍御史爾知紫毫不易置每歲宣城進筆時
紫毫之價如金貴慎勿空將彈失儀慎勿空將錄制詞

韋充筆賦

筆之健者用有所長惟茲載事或表含章雖發跡於衆
毫誠難穎脫苟容身於一管豈是鋒銑進必願言退亦
處默隨所動以授彩寓孤貞而保直修辭立句曾無點
畫之虧游藝依仁空負詩書之力恐無成而見擲常自
悚以研精擇才而丹青不間應用而工拙偕行所以盡
心於學者常巧於人情惟首出箇中長憂銑銳及文成
紙上或異知名以提挈不難發揮有自縱八體之俱寫

亦一毛而不墜何當入夢終期暗以相親倘用臨池詎
欲辭於歷試今也文章具舉翰墨皆陳秋毫以削寶匣
以新但使元禮之門不將黜額則知子張之手永用書
紳夫如是則止有所托有因然後錄名之際希數字於
伊人

衛公李德裕斑竹管賦

余寓居於郊外精舍有湘中太守贈以斑竹管奇彩燦
爛愛玩不足因為小賦以報之

山含杳兮瀟湘曲水潺湲兮出幽谷緣層嶺兮茂奇篠
夾澄瀾兮聳修竹鷗鷖起兮鈎輶白猿悲兮斷續實璫
璨兮來鳳根聯延兮倚鹿往者二妃不從獨處茲岑望
蒼梧兮日遠撫瑤瑟兮怨深洒思淚兮珠已盡染翠莖
兮苔更侵何精誠之感物遂散漫于幽林爰有良牧採
之巖趾表貞節於苦寒見虛心於君子始操截以成管
因天姿之具美疑貝錦之濯波似餘霞之散綺自我放
逐塊然巖中泰初憂而絕筆殷浩默以書空忽有客以

贈鯉因起予以雕蟲念楚人之所賦實周初之變風昔
漢代方侈增其炳煥綴明璣以為桺飾文犀而為玩
見傳徒有貴於繁華竟何資於藻翰曾不知擇美於江
潭訪奇於湘岸况乃彤管有煒列於詩人周得之而操
牘張得之而書紳惟茲物之日用與造化而齊均方寶
此以終老永躬耕乎典墳

韓愈毛穎傳

毛穎者中山人也其先明眎佐禹治東方土養萬物有

功封於卯地死為十二神嘗曰吾子孫神明之後不可
與物同當吐而生已而果然明眎八世孫翫世傳當殷
之時居中山得神仙之術能匿光使物竊姁娥騎蟾蜍
八月其後代遂隱不仕云居東郭者號曰東郭魏狡而
善走與韓盧爭能盧不及盧怒與宋狻謀而殺之醢其
家秦始皇時使蒙將軍恬南伐楚次中山將大獵以懼
楚召左右庶長與軍尉以連山筮之得天與人丈之兆
筮者賀曰今日之獲不用不牙衣褐之徒缺口而長鬚

八竅而趺居獨取其髦簡牘是資天下同其書秦其遂
兼諸侯乎遂獵圍毛氏之族拔其豪載穎而歸獻俘於
章臺宮聚其族而加束縛焉秦皇帝使恬賜之湯沐而
封之管城號管城子日見親寵任事穎為人強記而使
敏自結繩之代以及秦時事無不纂錄陰陽卜筮占相
醫方族氏山經地志字書圖畫九流百家天人之書及
至浮圖老子外國之說皆所詳悉又通當代之務官府
簿書市井貨錢注記惟上所使自秦始皇帝及太子扶

蘇胡亥丞相李斯中軍府令高下及國人無不愛重又
善隨人意正直邪曲巧拙一隨其人雖後見廢棄終默
而不洩惟不喜武士然見請亦時往累拜中書令與上
益狎上常呼為中書君上親決事以衡石自程雖宮人
不得立左右獨穎與執燭者常侍上休方罷穎與絳人
陳玄弘農陶泓及會稽褚先生友善相推置其出處必
偕上召穎三人者不待詔輒俱往上未嘗怪焉後因進
見上將有任使拂拭之因免冠謝上見其髮禿人所慕

畫不能稱上意上嘻笑曰中書君老而禿不任吾用吾嘗謂君中書君今不中書耶對曰臣所謂盡心者因不復召歸封邑終於管城其子孫甚多散處中國夷狄皆冒管城惟居中山者能繼父祖業太史公曰毛氏有兩族其一姬姓文王之子封於毛所謂魯衛毛昞者也戰國時有毛公毛遂獨中山之族不知其本所出子孫最為蕃昌春秋之成見絕於孔子而非其罪及蒙將軍拔中山之豪始皇封諸管城世遂有名而姬姓之毛無聞

穎始以俘見卒見任使秦之滅諸侯穎與有功賞不酬
勞以老見踈秦真少恩哉

周朴謝友人贈牋紙并筆

具紙譜

段成式寄溫飛卿葫蘆管筆往復二首

桐鄉往還見遺葫蘆管筆輒分一枚寄上下走困於守
拙不能大用瓠落之實有同於惠施豎原之種本慙於
屈轂然兩思榮器愁想酒杯嫵苦菜而不吟持長柄而
為贈未曾安筆却省歲書八月斷來固是佳者方知綠

沈赤管過於淺俗求太白麥穗獲臨賀石班蓋可為副
也飛卿窮素紉之業擅雄伯之名汾九流訂銓百氏
筆洒瀝而轉玉紙襞績而不供或助操彈且非玩好便
望審安承墨細度覆毫勿令仲宣等間敢詠也成式狀

溫庭筠答

庭筠累日來洛水寒疝荊州夜嗽筋骸莫攝邪蠱相攻
蝸睨傷明對蘭缸而不寢牛腸治嗽嗟藥錄而難求前
者伏蒙賜葫蘆筆管一莖久欲含詞聊申拜貺而上池

未效下筆無聊慙況沉吟出懷未叙然則產於何地得
自誰人而能絜以裁筠輕同舉羽豈伊籌草空操九寸
之長何必靈芝獨號三株之秀但曾藏戢冊省永貯仙
居供笑遺民遷永佳種惟應仲履忽壓煩聲豈常見已
墮遺犀仍抽直幹青松所染漆竹三珍足使玳瑁慙華
琉璃掩耀一枝為貴豈其陸生三寸見稱遂兼揚子謹
當刊於巖竹寘以郊翰隨纖刊而為牀擬高云而作屋
所恨書裙寡媚釘帳無功實醜凡姿空塵異貺庭筠狀

陸龜蒙石筆架子賦

枯可延年簾能照夜直為絕代之物以速連城之價爾
材雖足重質實無妍徒親翰墨謾費雕鐫到處而人爭
閣筆相逢而竟欲投篇若遇左太冲猶置門庭之下如
逢陸内史先焚章句之前寶跗非隣金匣不敵直堪諫
諍之士雅稱玄靈之客謝守邊城雨細題處堪憐陶公
嶺畔雲多吟中含惜或若君王有命璽素爭新則以火
齊水晶之飾龍骨象齒之珎窺臨舊硯襍染生春衛夫

人悶弄絲毫思量不到班婕妤好笑提丹筆眊眊無因若
自戢山如當樞几則叨居談柄之列辱在文房之理誠
非刻畫幾受譴於纖兒終假磨礪幸見容於夫子可以
資雪唱可以助風騷莫比巾箱之貴堪齊鉄研之高吟
洞庭之波秋聲散賦瑤池之月皓色可逃若有白馬
潛心雕龍在口鉤羅不下於三篋裁剪無慙於八斗零
陵例化肯後於雙飛玄晏書成願齊於不朽

陸龜蒙哀茹筆工辭

夫子之肱兮何綿綿耕不能耒兮漁不能船截筠束毫
既勝且便晝夜今古惟毫是錫爰有如夫工之良者責
其精拙在價高下闕齧义牙尚不能捨旬濡數鋒月禿
一把編如蠶拏汝實助也我書奇奇渾源未衰惟汝是
賴如何已而有兔十萬拔毛止皮散澁鈍銕緝脈靡辭
圓而不流銛而不歌在握方染亦如之為斲輪運斤傳
之者誰毫健身殞吾寧不悲

段成式寄余知古秀才散卓筆十管軟健筆十

管書

竊以孝經援神契夫子簪之以拜北極尚書中候周公授之以出玄圖其後仲將稍精右軍益妙張芝遺法聞氏新規其毫則景成愈於中山麝素劣於羊勁或得懸蒸之要或傳痛頡之方起自蒙恬蓋知其妙不唯玄首黃琯之製含丹纏素之華沾建備於一牀雕鏤上於二管而已附則大白交穗臨賀石班格為仙掌之形架作蓮花之狀限書一萬字應貴鹿毛書紙四十枚詎兼人

髮前件筆出自新銓散卓尤精能用青毫之長似學鐵頭之短況虎僕久絕桐燭難成鷹固無慙兔或增懼足使王朗遽閣君苗欲焚戶牖門牆足備其闕也

余知古謝段公五色筆狀

伏蒙郎中殊恩賜及前件筆竊以趙國名毫遼東仙管曾進言於石室奏議於園丘經阮籍而飛動稱神得王珣而形製方大妙合景純之讚奇標逸少之經利器莫先豈宜虛授某藝乏鴻彩膺此綠沉降自成麟翻將畫

虎空懷得手之媿如無落度之憂春蚓未成豐狐濫對
喜並出圖而授驚逾入夢之徵將欲遺於子孫清白莫
比更願藏之篋笥瑞應那同捧載明恩伏增感激謹狀

殷元筆銘云

宣神者言載言者書受以毫管妙有以數彌綸二儀包
括有無

孔璠之筆讚曰

疊疊柔翰敷微通神時淪古冥玄趨常新

文嵩四侯傳各附諸譜之末

管城侯

毛元銳字文鋒宣城人

闕

於東

墅而生昴宿一名旄頭遂姓毛氏世居兔

闕

少昊時因

少暴農之稼為鷓鴣氏所擒誅之以為乾豆其族有竄

於江南者居於宣城漂陽山中宗族毫盛元銳之世二

代祖聿因秦始皇時遣大將軍蒙恬南征吳楚疑其有

三窟之計恃狡而不從使前鋒圍而盡執其族擇其首

領首健者縻縛之獻於麾下大將軍問聿之能曰善編
錄簡冊自有文字已來注記略無遺漏大將軍竒之用
命為掾掌管記及凱旋聞於上為築城而居其族遂以
文翰著名具子士載漢時佐太史公修史有勁直之稱
天子因覽前代史嘉其述美惡不隱文簡而事脩拜左
右史以積勞累功封管城侯子孫世修厥職能業其官
累代襲爵不絕皆與名賢碩德如張伯英衛伯玉索幼
安鍾元常韋仲將王逸少王子猷並為執友歷宋齊已

來朝廷益以為重銳之曾大父如掾與王珣為神契之
交大父如聿與江文通紀少瑜有綵毫鏤管之惠皆文
章之會友也銳為人穎悟俊利其方也如鑿其圓也如
規其得用也稱旨則默默而作隨心應手有如風雨之
聲者有如鸞鶴迴翔之勢龍蛇奔走之狀者能為文多
記不倦濤染光祖德也起家校書郎直館遷中書令襲
爵管城侯聖朝庶政修

關

易玄光

同被詔常侍御案

關

須之友天

子以六合晏然志在墳典因詔元銳專職修撰銳久蒙
委用心力以殫至於疲憊書札粗疎懼不稱旨遂懇上
疏告老上覽之嘉歎曰所謂達士知止足矣優詔可之
曰壯則驅馳老則休息載書方冊有德可觀卿仰止前
招宜加厚禮可工部尚書致仕就國光優賢之道也仍
以其嗣職焉

史臣曰管城毛氏之先益昴宿之精取筆頭之名以為
氏以與姬姓毛伯鄭之後毛氏不同族也其子孫則盛

於毛伯之後其器用則編及日月所燭之地也天子至
於士庶無不重之者也朝廷及天下公府曹署隨其大
小皆處右職功德顯著宗族蕃昌云

文房四譜卷二

欽定四庫全書

文房四譜卷三

宋 蘇易簡 撰

硯譜

水滴器附

一之敘事

二之造

三之雜說

四之辭賦

一之敘事

昔黃帝得玉一紐治為墨海云其上篆文曰帝鴻氏之
研又太公金匱硯之書曰石墨相著而黑邪心讒言得

無汙白是知硯其來尚矣

釋名云硯者研也可研墨使和濡也

伍緝之從征記云魯國孔子廟中有石硯一枚製甚古

朴蓋夫子平生時物也

及顏路所請之車亦存

王子年拾遺云張華造博物志成晉武帝賜青鐵硯此

鐵于閩國所貢鑄為硯也

又吳都有硯山石

魏武上籀物疏云御物有純銀參帶臺研一枚純銀參

帶圓研大小各一枚

東宮故事云晉王太子初拜有漆硯一枚牙子百副

開元文字云硯者墨之器也

又皇太子納妃有漆書硯一

劉澄之宋初山川古今記云興平縣蔡子池石穴深二百許丈石青色堪為硯

說文云石滑謂之硯字從石見

魏甄后少喜書常用諸兄筆硯其兄戲之曰汝欲作女

博士耶后曰古之賢女未有不覽前史以觀成敗

或雲端州石硯匠識山石之文理鑿之五七里得一窟
自然有圓石青紫色琢之為硯可值千金故謂之子石
硯窟雖在五十里外亦識之

西京雜記云天子玉几冬加絺錦其上謂之絺几以象
牙火籠籠其上皆散華文後宮則五色綾紋以酒為書
滴取其不冰以玉為硯亦取其不冰

昔有人盜發晉靈公塚塚甚魁壯四角皆以石為攬犬

捧燭石人四十人皆立侍尸猶不壞九竅之中皆有金玉獲蟾蜍一枚大如拳腹容五合水潤如白玉取為盛滴器

張彭祖少與漢宣帝微時同硯席帝即位以舊恩封陽都侯出常參乘曹爽與魏明帝亦然

劉弘與晉武帝同見雜記中

李陽冰云夫硯用則貯水畢則乾之若久浸不乾墨乃不發墨既不發書乃多漬水在清淨宜取新水密護塵埃忌用煎煮之水也

袁象贈庾易蟬硯

見筆譜中

梁武帝性純儉吳令唐鏞進鑄成盤龍火爐翔鳳硯蓋

詔禁錮終身

二之造

柳公權常論硯言青州石為第一絳州者次之殊不言
端溪石硯世傳端州有溪因曰端溪其石為硯至妙益
墨而至潔其溪水出一草芊芊可愛匠琢訖乃用其草
裹之故自嶺表迄中夏而無損也噫豈非天使之然耶

或云水中石其色青山半石其色紫山絕頂者尤潤如
猪肝色者佳其貯水處有白赤黃色點者世謂之鸛鵒
眼或脉理黃者謂之金線文尤價倍于常者也其山號
曰斧柯山即觀碁之所也昔人採石為硯必中牢祭之
不爾則雷電勃興失石所在其次有將軍山其硯已不
及溪中及斧柯者

今歙州之山有石俗謂之龍尾石匠製之其硯色黑亞
于端若得其石心則巧匠就而琢之貯水之處圓轉如

渦旋可愛矣

魏銅雀臺遺址人多發其古瓦琢之為硯甚工而貯水數日不燥世傳云昔人製此臺其瓦俾陶人澄泥以締濾過加胡桃油方埏埴之故與衆瓦有異焉即今之大名相州等處土人有假作古瓦之狀硯以市于人者甚衆

繁欽硯贊云或薄或厚乃圓乃方方如地象圓似天光班采散色漚染毫芒點黛文字輝明典章施而不德吐

惠無疆浸漬甘液吸受流芳

蓋今制之令薄者常觀之見令一夫捧持近方琢之或
內于稻穀中出于半而理之其鑿如麤針許製畢有如
表紙厚薄者或有全良石之材工具內而質其外者或
規如馬蹄銳如蓮葉上圓下方如圭如璧者圓如盤而
中隆起水環之者謂之辟雍硯亦謂之分題硯腰半微
坳謂之郎官樣者連水滴器於其首而為之者穴其防
以導水焉閉其上穴則下穴取水流注於硯中或居則

略無沾覆繁之銘見之矣

又繁欽硯頌曰鈞三趾於夏鼎象辰宿之相扶今絕不見三足硯僕常遊盱眙泉水寺過一山房見一老僧擁衲向暘模寫梵字前有一硯三足如鼎製作甚古僕前舉而訝之僧白眼默然不荅僕因不復問其由是知繁欽頌足可徵矣

傅玄硯賦云木貴其能軟石美其潤堅因知古亦有木硯

作澄泥硯法以瑾泥令入於水中按之貯於甕器內然後別以一甕貯清水以夾布囊盛其泥而擺之俟其至細去清水令其乾入黃丹團和洩如麵作二模如造茶者以物擊之令至堅以竹刀刻作硯之狀大小隨意微磨乾然後以刀手刻削如法曝過間空罅於地厚以稻糠并黃牛糞攪之而燒一復時然後入墨蠟貯米醋而蒸之五七度含津益墨亦足亞於石者

唐文李撰資暇云稠桑硯始因元和初其叔祖宰號之

朱陽邑諸阮溫清之隙必訪山水以遊一日於澗側見一紫石憩息於上佳其色且欲紀其憩山之遊既常攜鐫且隨至自勒姓氏年月遂刻成文復無剝缺乃曰不頑不赭可琢為硯矣既琢一硯而過但惜其重大無由出之更行百步許至有小如拳者不可勝致遂令從者挈數拳而出就縣第製琢有胥精巧請琢之遂請解胥籍于是採琢閒席於大路厥利驟肥後諸阮每經稠桑必相率致硯以報其本焉稠桑石硯自此也

三之雜說

古人有學書于人者數年自以其藝成遂告辭而去師曰吾有一篋物可附于某處及山之下絕無所附又封題亦甚不密乃啓之皆磨穴者硯數十枚此人方知其師夙之所用者也乃返山服膺至皓首方畢其藝是知古人工一事必臻其極焉

西域無紙筆但有墨彼人以墨磨之甚濃以瓦合或竹節卽其硯也彼國人以指夾貝葉或藤皮掌藏墨研以

竹筆書梵字橫讀成文蓋順葉之長短也韋見梵僧沸唇緩頰歷眸之間數行俱下即不知其義也

藍田玉順山悟真寺有高僧寫涅槃經羣鵠自空中銜水添硯水竭畢至曾聞彼山僧傳云亦見于白傳百韻詩

常有蟻為精為王者遊獵于儒士之室儒士見之甚微且顯乃于几案之上硯中施罾網獲魴鯉甚多

鄭朗以狀元及第覆落甚不得志其几案之硯忽作數

十聲鄭愈不樂時洪法師在座曰硯中作聲有聲價之
象朗後果入臺輔斯吉兆也明矣今直閣范舍人杲言
頃自大著直館于史閣中與諸學士清話間范公几案
之上所用硯忽作一十五聲丁丁然甚駭之范獨內喜
迨半月有朱衣銀魚之賜亦異事也

魏有芝生銅硯

今覩歲貢方物中號州鍾馗石硯二十枚未知鍾馗得
號之來由也

越州戒珠寺即羲之宅有洗硯池至今水常黑色今金
州廉使錢公言

僖宗時鄭畋盧攜同為相不協議黃巢事忽爭於中書
堂盧拂衣而起袂染於硯而投之

開元傳信記云玄宗所幸美人忽夢人邀去縱酒密會
因言于上上曰必術人所為也汝若復往宜以物誌之
其夕熟寐飄然又往半醉見石硯在前乃密印手文於
曲房屏風上悟而具啓乃潛令人訪之於東明觀見其

屏風手文尚在所居道人已逝矣

梁元帝忠臣傳曰劉引沛國人常寄居洛陽與晉武帝同硯書

筆陣圖以水硯為城池

異苑蔣道支於水側見一浮攄取為研製形象魚有道家符識及紙皆置魚研中嘗自隨二十餘年忽失之夢人云吾暫遊湘水過湘君廟為二妃所留今暫還可於水際見尋也道支詰旦至水側見罾者得一鯉魚買剖

之得先時符讖及紙方悟是所夢人棄之俄而雷雨屋
上有五色氣直上入雲有人過湘君廟見此魚研在二
妃側

宣室志云有蔣生者好道之士也逢一貧窶人自稱章
全素自役使來怠墮頗甚蔣生頻櫛楚之忽一日語蔣
生曰君儿上石硯杲可點之為金蔣生愈怒其誑誕時
偶蔣生忽出迨歸章公已死矣然失几上之硯因窺藥
鼎中有奇光試探得硯而一半已為紫磨金矣蔣因歎

憤終身也

近石晉之際關右有李處士者放達之流也能畫馴狸復能補端硯至百碎者賁歸旬日即復舊焉如新琢成略無瑕類世莫得其法也

四之辭賦

傅玄硯賦

採陰山之潛璞簡衆材之攸宜節方圓以定形鍛金鐵而為池設上下之剖判配法象乎二儀木貴其能軟石

美其潤堅加朱漆之膠固舍冲德之清玄

楊師道咏硯詩

圓池類璧水輕翰染烟華將軍欲定遠見棄不應賒

李尤硯銘

書契既造硯墨乃陳篇籍永垂紀誌功勛

魏王粲硯銘

昔在皇胡爰初書契以代結繩人察官理庶績誕興在世李末華藻流淫文不為行書不盡心淳樸澆散俗以

崩沉墨連翰染榮辱是懲念茲念茲唯玄是徵

唐李賀青花紫硯歌

端州石匠巧如神踏天磨刀割紫雲傭剝抱水含滿唇
暗灑長弘冷血痕紗帷晝暖墨花春輕漚漂沫松麝薰
乾膩薄重立脚勻數寸秋光無日昏圓毫促點聲清新
孔硯寬碩何足云

傅玄水龜銘

鑄茲靈龜體像自然含源吐水有似清泉潤彼玄墨染

此桑翰申情寫素經緯羣言

韓愈瘞硯銘

序曰隴西李元賓始從進士貢在京師或貽之硯既四年
悲歡否泰未嘗廢用凡與之試藝春官實二年登上第
行于褒谷間誤墜地毀焉乃匣歸埋設於京師里中昌
黎韓愈其友人也贊而識之

土乎成質陶乎成器復其質非生死類全斯用毀不忍
棄埋而識之仁之義硯乎研乎與瓦礫異

張少博石硯賦

硯之施也備乎用石之質也本乎山溫潤稱珍騰異彩而玉色追琢成器發奇文而綺斑蓋求伸於知己爰待用於君子故立言之徒載筆之史將吮墨以濡翰乃操觚而汲水始爛爛以光徹終霏霏而烟起或外圓而若規或中平而如砥原夫匠石流盼藻熒生輝象龜之負圖乍伏如鵲之緘印將飛設之戶庭王充之名允著置之藩溷左思之用無違徒觀夫清光景耀真質霜淨符

彩華鮮精明隱映皎如之色比藏冰之玉壺煥然之文
狀吐菱之石鏡當其山谷之側沉冥未識韞玉吐雲懷
珍隱德及入用以磨礪因人而拂拭故能拊之類磬發
奇音對之若鏡開新色既垂文以呈象亦澄瀾而漬墨
硯之用也詎可興嘆而焚石乃磴然孰謂有時而泐斯
可以正典謨之紀垂篆籀之則者也遂更播美六書傳
芳三妙用之漢帝嘗同彭祖之席存之魯國猶列宣尼
之廟是以遺文可述茲器奚匹匪銷匪鑠良金安可比

其剛不磷不緇美玉未足方其質光鳥蹟于青簡發龜
文于洪筆則知創物作程事與利并茲硯也所以究墨
之妙窮筆之精者也

黎逢石硯賦

有子墨客卿從事於筆硯之間學舊史之暇日得美石
於他山琢而磨之其滑如砥欲精研而染翰在虛中而
貯水水隨暈而環周墨浮光而黛起明而未融是以為
用久而不渝故以為美成器尚古徵闕里之素王匠法

增華參會稽之內史且王言惟一道心惟微予以幽贊
由之發揮從人之欲委質莫違世若遐棄民將疇依肅
觀光而霧集賴設色而烟霏實將振文而為邦豈惟蘊
玉而山輝者哉君無謂一拳之石取其堅君無謂一勺
之水取其淨君其遂取我有成性苟有補于數閔固無
辭于蘊映惟聖人有大寶昊天有成命莫不自我以載
形因我以施令志前王之事業作後人之龜鏡夫物遷
其常天運不息水有涸兮石有泐世貴其不磷我則受

其磨世貴其不染我則受其黑象山下之泉為天下之
式因碌碌于俗間類栖栖于孔墨嗚呼辭上體要文當
絕妙雖濡翰其不疲無煩文而取誚然實君子以其勁
質或升之堂或入之室對此大匠厠諸鴻筆見珍于殺
青之辰為用于草玄之日夫氣結為石物之至精攻之
為硯因用為名事若可久世將作程斯器也不獨堅之
為貴諒於人之有成

吳融字子華古瓦硯賦

勿謂乎柔而無剛土埏而為瓦勿謂乎廢而不用瓦斷
而為硯藏器蠶屈逢時豹變陶甄已往含古色之幾年
磨瑩俄新貯秋光之一片厥初在治成象毀方効姿論
堅等甃聞縹勝瓷人莫我知是冬穴夏巢之日形為才
役乃上棟下宇之時扶同杞梓迴避茆茨若乃臺號姑
蘇殿稱杙楫樓標十二之聳閣起三重之麗莫不瓊甌
凝輝鴛鴦疊勢縫密如鑠行踈若綴御來而月影重重
漏出而爐香細細觚稜金爵競託宮堯玉女胡人爭來

睥睨陵谷難定松薪忽焉朝歌有已秀之麥咸陽有不
滅之烟是則縱橫舊趾散亂荒阡風飄早落雨滴仍穿
藏瀾迤之春蕪耕牛脚下照青熒之鬼火戰骨堆邊誰
能識處亦莫知年何期邂逅見寵雕鐫資乎有作備我
沉研磬在水以羞浮鐘因霜而謝響玉滴一墮松烟四
上山難誤舞澄明之石鏡當頭織女疑來清淺之銀河
在掌異哉昔之藏歌蓋舞庇日干霄繁華幾代零落一
朝委地而合墮塵土依人而却住瓊瑤天祿石渠和鉛

即召風臺雪苑落筆爭邀依依舊物歷歷前朝沈家令
坐上迴看能無淚下江中書歸來偶見得不魂銷有以
見古今推移牢籠眇漫成敗皆分短長一貫何樹春秋
各十年何花開落唯一旦星隕地以為石盡滅光輝雞
升天而上仙別生羽翰異類猶然浮生莫算

王嵩寧孔子石硯賦

昔夫子有石硯焉邈觀器用宛無雕鐫古石猶在今人
尚傳從歎鳳兮何世至獲麟兮幾年世歷近王近霸年

止幾徂幾遷任迴旋於几席垂翰墨於韋編時亦遠矣
物仍在焉非聖人之休祐安得茲而不捐泊乎俗遠聖
賢教移齊魯列廟以居先師攸主上熒熒以光徹旁梟
梟而色固介爾堅貞確乎規矩昔有諸侯立政周道無
聞嗟禮樂之仍缺歎詩書之未分聖人乃啟以褒貶垂
以典墳必藉斯器用成斯文蓋石固而人往亦事存乎
硯云至乃方質圓形錮模龜首雕飾為用陶甄可久橫
綵烟而不絕漆淥水之常有豈如是石斯為不朽昔偶

宣父厥容伊何旁積垂露中含偃波時代遷移去游夏而彌遠日月逾邁變炎涼之已多別有縫掖書生獻策東京仰望先哲攻文後成叨秉筆以當問愧含毫而頌聲

李琪謝朱梁祖大硯瓦狀

蒙恩賜臣前件硯者伏以記室濡毫于楮鼻刀側非史多臣染翰于螭頭箇形甚小尚或文章煥發言動必書為號令之詞作典謨之訓如臣者坐憂才短行怯思遲

自叨金馬之近班常愧王瞻之舊物豈意又頒文器周
及禁林製作泓渟規模廣滑閉宮苔而色古連治石以
光凝敢不致在坐隅酣茹筆陣餘波浸潤便同五老之
壺終日拂磨豈但一丸之墨如承重寶倍感深恩

僧貫休詠硯詩

淺薄雖頑朴其如近筆端低心蒙潤久入匣更身安應
念研磨苦無為瓦礫看倘然人不棄還可比琅玕

魏繁欽硯頌

有般倖之妙匠兮倪詭異於遐都稽山川之神瑞兮識
嘉璇之內敷遂縈繩于規矩兮假卞氏之遺模擬渾靈
之肇制兮效羲和之毀隅鈞三趾于夏鼎兮象辰宿之
相扶供無窮之秘用兮御几筵而優遊

莊南傑寄鄭礶疊石硯歌

媧皇補天殘錦片飛落人間為石硯孤峯削疊一尺雲
虎幹熊跪勢皆偏半掬春泉澄淺清洞天徹底寒泓泓
筆頭搶起松烟輕龍蛇怒聞秋雲生我今得此以代耕

如探禹穴披崢嶸心骨驚坐中髣佛到蓬瀛

李琪詠石硯

遠來何嶺外近到玉堂間乍琢文猶澁新磨墨尚慳不能濡大筆何事別秋山

劉禹錫贈唐秀才紫石硯詩

端溪石硯人間重贈我因知正草玄闕里廟中空舊物開方竈下豈天然玉蜨吐水霞光淨彩翰搖風絳錦鮮此日傭工記名姓因君數到墨池前

文嵩即墨侯石虛中傳

石虛中字居默南越高要人天性好山水隱遁不仕因採訪使遇之於端溪謂曰子有樸質沉厚之德兼有奇相體貌紫光噓呵潤澈頗負材器但未遇哲匠琢磨耳禮不云乎玉不琢不成器人不學不知道子其謂矣今明天子御四海六合之內無不用之材無不成之器我今奉命巡察天下風俗採訪海內遺逸安敢輒忘厥職見賢不薦者歟子無戀溪泉自取沉棄耳虛中曰僕生

此南土遠在峽隅自不知材堪器用既辱採顧敢不唯
命是從採訪使遂命博士金漸之規矩磨礪不日不月
果然業就虛中器度方員皆有邊岸性格謹默中心坦
然若汪汪萬頃之量也採訪使以聞于省有司考試之
與燕人易元光研覈合道遂為雲水之交有司以薦于
上上授之文史登臺省處右職上利其器用嘉其謹默
詔命常侍御案之右以備濡染因累勛績封之即墨侯
虛中自歷位常與宣城毛元銳燕人易元光華陰耆知

白常侍上左右皆同出處時人號為相須之友

史臣曰衛有大夫石碯其先顓帝之苗裔也出靖伯之後曰甫甫生石仲仲之後曰碯春秋時仕衛世為大夫焉即墨侯石氏與衛大夫族不同也蓋出五行之精八音之靈岳結而生稟質而名懷寶為玉吐氣為雲發矧利刃與天地常存者也

文房四譜卷三

欽定四庫全書

子部
文房四譜卷四
五

詳校官中書臣李彤

貢外郎臣牛稔文覆勘

總校官編修臣王燕緒

校對官主事臣陳墉

謄錄監生臣范鍾

欽定四庫全書

文房四譜卷四

宋 蘇易簡 撰

紙譜

一之敘事

二之造

三之雜說

四之辭賦

一之敘事

周禮有史官掌邦國大事書於策小事簡牘而已而又古用札釋名云札者櫛也如櫛之比編之也亦策之類

也漢興已有幡紙代簡而未通用至和帝時蔡倫字敬仲用樹皮及敝布魚網以為紙奏上帝善其能自是天下咸謂之蔡侯紙

左伯字子邑漢末益能為之故蕭子良荅王僧虔書云子邑之紙妍妙輝光仲將之墨一點如漆

說文云紙者絮一苦也從糸氏聲蓋古人書于帛故裁其邊幅如絮之一苦也

真誥云一條有楊椽椽名曦書兩本一黃牋一碧牋魏

韋誕云蔡邕非紈素不妄下筆

張芝善書寸紙不遺有絹必先書後練

桓玄詔平淮作桃花牋紙及縹綠青赤者蓋今蜀牋之製也

真誥云三君多書荊州白牋紙歲月積久首尾零落或兼缺爛前人糊榻不能悉相連補

墨藪云紙取東陽魚卵虛柔滑淨者

三輔決錄曰韋誕奏蔡邕自矜能書兼明斯喜之法非

得紉素不妄下筆工欲善其事必先利其器用張芝筆
左伯紙及臣墨皆古法兼此三具又得臣手然後可以
盡經丈之勢方寸之言

晉時為詔以青紙紫泥

貞觀中始用黃紙寫勅制

高宗上元二年詔曰詔勅施行既為永式比用白紙多
有蟲蠹宜令今後尚書省頒下諸司諸州縣並宜用黃

紙

歐陽通紙必堅潔白滑者方書之

陶侃獻晉帝牋紙三千枚極妙并墨

東宮舊事皇太子初拜給赤紙縹紅麻紙勅紙各一百張

雷孔璋曾孫穆之猶有張華與祖書乃桑根紙也

王右軍為會稽令謝公就乞牋紙庫內有九萬枚悉與之桓宣武云逸少不節

抱朴子曰洪家貧伐薪買紙墨故不得早涉藝文常乏

紙每所寫皆反覆有字人少能讀

御史故事云按彈奏白簡為重黃紙為輕今一例白紙
無甚差降矣

釋名曰紙者砥也謂平滑如砥石

幡紙古者以縑帛依書長短隨事截之以代竹簡也

前漢服虔通俗文曰方絮曰紙字從系氏無氏下從巾
又桓玄令曰古無紙故用簡非主於恭今諸用簡者宜
以黃紙代之

虞豫表云祕府有布紙三萬餘枚不任寫御書乞四百枚付著作史寫起居注

廣義將軍岷山公以黃紙上表於慕容儁儁曰吾名號未異於前何宜便爾讓令以白紙稱疏

古有藤角紙范甯教云土紙不可作文書皆令用藤角紙

古謂紙為幡亦謂之輭蓋取繒帛之義也自隋唐已降乃謂之枚

魏武令曰自今諸掾屬侍中別駕常於月朔各進得失
給紙函各一

張華造博物志成晉武帝賜側理紙萬番南越所貢漢
人言陟釐與側理相亂蓋南人以海苔為紙其理縱橫
邪側因以為名

東觀漢記曰和熹鄧后立時方國貢獻悉令禁絕歲時
但貢紙墨而已

李陽冰云紙常宜收藏篋笥勿令風日所侵若久露埃

塵則枯燥難用矣攻書者宜謹之

古彈文白紙為重黃紙為輕故彈王源表云源官品應黃紙臣輒奉白簡以聞矣

國史補云紙之妙者則越之剡藤苔牋蜀之麻面屑骨金花長麻魚子十色牋雲陽州六合牋蒲州白薄重妙臨川滑重

唐韋陟書名如五朵雲每以綵牋為緘題時人譏其奢縱

抱朴子曰吳之杪李有不知五經之名而饗儒官之祿
不嫻尺紙之寒暑而坐著作之地筆不注簡而受駁議
之勞

干寶表曰臣前聊欲撰記古今怪異非常之事會聚散
逸使自一貫博訪知古者片紙殘行事事各異又乏紙
筆或書故紙詔荅云今賜紙二百枚

晉令諸作紙大紙一尺三分長一尺八分聽叅作廣一
尺四寸小紙廣九寸五分長一尺四寸

石虎詔曰先帝君臨天下黃紙再定至於選舉於銓用為允可依晉氏九班為準格

京邦記東宮臣上疏用白紙太子合用青紙

崔瑗與葛元甫書今送許子十卷貧不及素但以紙耳徐邈與王珉書東宮臣既黃紙奉表於天朝則宜白紙上疏於儲宮或說白紙稱表吾謂無此體

山簡表臣父故侍中司徒濟奉先帝手筆青紙詔

二之造

漢初已有幡紙代簡成帝時有赫蹏書詔應劭曰赫蹏
薄小紙也至後漢和帝元興中常侍蔡倫剡故布及魚
網樹皮而作之彌工如蒙恬以前已有筆之謂也又棗
陽縣南有蔡倫故宅彼土人多能作紙又庾仲雍相州
記云應陽縣蔡子池南有石白云是蔡倫舂紙臼也一
云耒陽縣

黔歛間多良紙有凝霜於心之號復有長者可五十尺
為一幅蓋歛民數日理其楮然後於長船中以浸之數

十夫舉抄以抄之傍一夫以鼓而節之于是以大熏籠周而焙之不上於牆壁也由是自首至尾勻薄如一蜀中多以麻為紙有玉屑屑骨之號江浙間多以嫩竹為紙壯土以桑皮為紙剡溪以藤為紙海人以苔為紙浙人以麥麴稻稗為之者脆薄焉以麥膏油藤紙為之者尤佳

漢末左伯字子邑又能為紙故蕭子良荅王僧虔書云子邑之紙妍妙輝光仲將之墨一點如漆伯英之筆窮

神盡思妙物遠矣邈不可追

仲將韋誕字也

宋張永自造紙墨

蜀人造十色牋凡十幅為一榻每幅之尾必以竹夾夾和十色水逐榻以染當染之際棄置椎埋堆盈左右不勝其委頓逮乾則光彩相宣不可名也然逐幅于方版之上研之則隱起花木麟鸞千狀萬態又以細布先以麵漿膠令勁挺隱出其文者謂之魚子牋又謂之羅牋今剡溪亦有焉亦有作敗麵糊和以五色以紙曳過令

露濡流離可愛謂之流沙牋亦有煮皂莢子膏并巴豆
油傅於水面能點墨或丹青於上以薑搵之則散以狸
鬚拂頭垢引之則聚然後畫之為人物研之為雲霞及
鷺鳥翎羽之狀繁縟可愛以紙布其上而受采焉必須
虛窻幽室明潔淨水澄神慮而製之則臻其妙也近有
江表僧於內庭造而進上御毫一灑光彩煥發

晉武賜張華側理紙已具敘事中本草云陟釐味甘大
溫無毒止心腹太寒溫中消穀強胃氣止洩痢生江南

池澤陶隱居云此即南人用作紙者唐本注云此物乃水中苔今取為紙名為苔紙青黃色體濫小品方云水中蘆苔也音陟釐陟釐與側黎相近側黎又與側理相近也又云即石髮也

薛道衡詠苔紙云今來承玉管布字轉銀鈎

榻紙畫紙法

見雜說門

永徽中定州僧修德欲寫華嚴經先以沉香積水種楮樹俟其拱取之造紙

丹陽記江寧縣東十五里有紙官署齊高帝于此造紙

之所也常造凝光紙賜王僧虔

一云銀光紙也

林邑記云九真俗書樹葉為紙

段成式在九江出意造紙名雲藍紙以贈溫飛卿

三之雜說

鄴中記石虎詔書以五色紙著木鳳凰口中令銜之飛
下端門

庾永興荅王羲之書曰得示連紙一丈致辭一千增其
歎耳了無解往懷

江南偽主李氏常較舉人畢放榜日給會府紙一張可
長二丈濶二丈厚如縑帛數重令書合格人姓字每紙
出則縫掖者相慶有望於成名也僕頃使江表觀今壞
樓之上猶存千數幅

畫品云古畫尤重紙上者言紙得五百年絹得三百年
方壞

紙投火中烟起尤損人令肺腑中有所傷坐客或云天
下神祠中巫祝間少有肥者蓋紙錢烟常燼其鼻息故

也

山居者常以紙為衣蓋遵釋氏云不衣蠶口衣者也然復甚煖衣者不出十年黃面而氣促絕嗜欲之慮且不宜浴蓋外風不入而內氣不出也

亦嘗聞造紙衣法每一百幅用胡桃乳香各一兩煮之不爾蒸之亦妙如蒸之即恒灑乳香等水令熱熟陰乾用箭幹橫卷而順蹙然患其補綴繁碎今點歛中有人造紙衣段可如大門闔許近士大夫征行亦有衣之蓋

利其拒風於凝沍之際焉陶隱居亦云武陵人作穀皮衣甚堅好也

今江浙間有以嫩竹為紙如作密書無人敢拆發之蓋隨手便裂不復粘也

羊續字叔祖以清率下紙帷布被敗以紙糊補之時為南陽守

在昔書契已還簡策作矣至於厥後或以縑帛蔡侯有作方行於世近代以來陰陽卜祝通於幽冥者必斷紙

為幣以賂諸冥漠君每覩諸家玄怪之語或有鬼祈於人而求之者或有賂之而獲洪福者噫游魂為變綿古而然漢室已前鬼何所資乎得非神不能自神而隨世之態乎

唐末太學博士邱光庭亦有紙錢說文多不錄

杜陽編德宗廟有朱鳥來常噉玉屑聲甚清暢及為鷲鳥所搏宮人皆以金花牋寫多心經薦其冥福

張平子與崔子玉書云乃者朝賀明日讀太玄經玄曰百歲其興乎端力精思以揆其義使人難論陰陽之事

足下累世窮道極微子孫必命世不絕且幅寫一通藏之待能者幅寫者絹帛代紙以寫也

邢子才少在洛陽會天下無事專為山水之遊時人方之王粲荀文一出京師為之紙貴

陳後主常令八婦人襞綵牋製五言詩

魏收文襄令為檄梁文初夜執筆三更便成文過七紙杜暹為婺州叅軍秩滿將歸吏以紙萬張贈之暹惟受百幅人歎之曰昔清吏受一大錢復何異

張仲舒在廣陵天雨絳羅牋紙紛紛甚駛非吉兆也

馬融與竇伯向書曰孟陵奴來賜書手跡歡喜何量次於面也書惟兩紙紙八行七字延篤荅張惟奐書曰惟別三年夢想言念何日有違伯英來惠書書盈四紙讀之反覆喜不可言

張奐與陰氏書曰舊念既密文章粲爛名實相副捧讀周旋紙弊墨渝不離於手

羲之永和九年製蘭亭序乘樂興而書用蠶繭紙鼠鬚

筆適媚勁健絕代更無太宗後得之洎玉華宮大漸語
高宗曰吾有一事汝從之方展孝道高宗泣涕引耳而
聽言得蘭亭序陪塋吾無恨矣

鄭虔為廣文博士學書病無紙知慈恩寺有柿葉數屋
遂借僧房居止取紅葉學書歲久殆徧

歷代名畫記云背書畫勿令用熟紙背必皺起宜用白
滑漫薄大幅生紙紙縫先避畫者人面及要節處若縫
之相當則強急卷舒有損要令參差其縫則氣力均平

太硬則強急太薄則失力絹素彩色不可擣理紙上白畫可以砧石妥帖之仍候陰陽之氣調適秋為上時春為中時夏為下時暑濕之時不可也

歷代名畫記云江東地潤無塵人多精藝好事者常宜置宣紙百幅用法蠟之以備模寫古人好搨畫十得七八不失神彩筆蹟亦有御府搨本謂之官搨

搨紙法用江東花葉紙以柿油好酒浸一幅乃下鋪不浸者五幅上亦鋪五幅乃細卷而硯之候浸漬染着如

一搨書畫若俯止水窺朗鑑之明徹也

初舉子云宜賞入詞場以護試

紙逢他物所污

庾闡字仲初造揚都賦成其文偉麗時人相傳爭寫為之紙貴

漢成帝趙婕妤妬後宮有兒生八九日客持詔記封綠小篋與獄中婦人發篋裏有藥二枚赫蹏書曰告偉能努力飲此藥孟康曰赫蹏染黃素令赤而書之若今黃紙也劉展曰赫音閔兄弟閔于牆應劭曰赫蹏薄小紙

也玄有所說

本草拾遺云印紙剪取印處燒灰水服令人絕產

撫州有茶衫子紙蓋裹茶為名也其紙長連自有唐以

來禮部每年給明經帖書

見茶譜

藥品中有閃刀紙蓋裁紙之際一角疊在紙中匠人不
知漏裁者醫人入藥用

孔溫裕因直諫貶柳州司馬有鵲喜于庭兒孫拜之飛
去墜下方寸紙上有補闕字未幾徵還果有此拜

見因話錄

資暇云松花牋世以為薛濤牋誤也松牋其來舊矣元和之初薛濤尚斯色而好製小詩惜其幅大不欲長濤乃命匠人狹小為之蜀中才子既以為便後減諸牋亦如是特名曰薛濤牋今蜀中紙有小樣者皆是也非松花一色

魏人謗邢劭曰邢家小兒常作文表自買黃紙寫之而送

司馬消難不知書書架上徒設空紙時人云黃紙五經

赤軸三史

蘇緯為公正周文推心委任而無間或出遊常豫置空紙以授緯若須有處分則隨事施行及還啟知而已南朝有士人朱詹家貧力學常吞紙療饑

今大寮書題上紙籤出於李趙公

唐初將相官告亦用銷金牋及金鳳紙書之餘皆魚牋花牋而已厥後李肇翰林志云凡賜與徵召宣索處分曰詔用白麻紙慰撫軍旅曰書用黃麻紙大清宮內道

觀薦告辭文用青藤紙朱書謂之青辭諸陵薦告上衣
表內道觀文並用白藤紙凡赦書德音立后建儲大誅
討免拜三公命相命將並用白藤紙不用印雙日起草
隻日宣宰相使相官告並用色背綾金花紙節度使並
用白背綾金花紙命婦即金花羅紙吐蕃及贊普書及
別錄用金花五色綾紙上白檀木真珠瑟瑟鈿玉金鎖
鑰吐蕃宰相摩尼師已下書用五色麻紙南詔及青平
官書用黃麻紙

唐朝進士榜頭粘堅黃紙四張以氈筆淡墨袞轉書曰

禮部貢院四字

或云文皇以飛白書
或云象陰注之象

宣宗雅好文儒鄭鎬知貢舉忽以紅牋筆札一名紙曰
鄉貢進士李御名以賜之

孫放西寺銘曰長沙西寺層構傾頽謀欲建立其日有
童子持紙花插地故寺東西相去十餘丈于是建刹正
當紙花處

攝生者尤忌枕高宜枕紙二百幅每三日去一幅漸次

取之迫至告盡則可不俟枕而寢也若如是則腦血不減神光愈盛矣

神仙傳云李之章神仙人也蜀先主欲伐吳問之章乃求紙筆畫作兵馬數十手裂壞之又畫一大人又壞之先主出軍敗衄

戴祚甄異傳云王肇常在內宿晨起出外妻韓氏時尚未覺而奴子云郎索紙百幅韓視帳中見肇猶卧忽不復見後半歲肇亡

王琰冥祥記云元嘉八年蒲坂城中大災火里中小屋雖焚而於煨燼下得金經紙素如故

林邑記九真俗書樹葉為紙廣州記取穀樹皮熟槌堪為紙蓋蠻夷不蠶乃被之為褐也

釋迦佛為磨休王時剥皮為紙寫大乘經

見筆譜

王羲之筆經云以麻紙裹柱根欲其體實得水不脹搜神記益州西南有神祠自稱王石公祈禱者持一百幅紙及筆墨放石室中則言吉凶

劉恂嶺表異錄云廣管羅州多柞香樹身似柅柳其花
白而繁其葉如橘皮堪作紙名為香皮紙皮白色有文
如魚子牋雷羅州義寧新會縣率多用之其紙慢而弱
沾水即爛遠不及楮皮者

世說戴安道就范宣學所為范讀書亦讀書范抄紙亦
抄紙

四之辭賦

傅咸紙賦

蓋世有質丈則理有損益故禮隨時變而器與事易既
作契以代結繩今又造紙而當策夫其為物厥美可珍
廉方有則體潔性真含章蘊藻實好斯文取彼之淑以
為已新攬之則舒捨之則卷可屈可伸能幽能顯

梁江洪為傅建康詠紅箋詩

雜采何足奇惟紅偏可作灼爍類渠開輕明似霞破鏤
質卷芳脂裁花承百和韞不遇情牽人豈入風雅座

後梁宣帝詠紙詩

皎白猶霜雪方正若布基宣情且記事寧同魚網時

薛道衡詠苔紙詩

昔時應春色引淥泛清流今來承玉管布字轉銀鈎

梁武威謝公紙啓略云

雖復鄴殿鳳銜漢朝魚網平淮桃花中宮穀樹固以慙
茲靡滑謝此鮮光

韋莊乞彩牋歌

浣花溪上如花客綠闇紅藏人不識留得溪頭瑟瑟波

潑成紙上猩猩色手把金刀裁綵雲有時剪破秋天碧
不使紅霓段段飛一時驅上丹霞壁蜀客才多染不供
卓文醉後開無力孔雀銜來向日飛翩翩壓折黃金翼
我有歌詩一千首磨礱山岳羅星斗開卷長疑雷電驚
揮毫只怕龍蛇走班班布在詩人口滿軸松花都未有
人間無處買烟霞須知得自神仙手也知價重連城璧
一紙萬金猶不惜薛濤昨夜夢中來慇懃勸向君邊覓

僧齊己謝人贈碁子綵箋詩

陵州碁子浣花箋深愧攜來自錦川海蚌琢成星落落
吳綾隱出雁翩翩留防桂花題詩客惜寄桃源敵手仙
捧受不堪思出處七千餘里劍門前

舒元興悲刺溪古藤文

刺溪上綿四五百里多古藤株枿逼土雖春入土脉他
值發活獨古藤氣候不覺絕盡生意予以為本乎地者
春到必動此藤亦本于地方春且死色問溪上人有道
者言溪中多紙工刀斧斬伐無時劈剥皮肌以給其業

噫藤雖植物者溫而榮寒而枯養而生殘而死亦將似
有命于天地間今為紙工斬伐不得發生是天地氣力
為人中傷致一物疾癘之若此異日過數十百郡洎東
洛西雍歷見書文者皆以剡紙相夸予寤曩見剡藤之
死職止由此此過固不在紙工且今九牧士人自專言
能見文章戶牖者其數與麻竹相多聽其語其自安重
皆不啻握驪龍珠雖苟有曉寤者其倫甚寡不勝衆者
亦皆斂手無語勝衆者果自謂天下文章歸我遂輕傲

聖人道使周南召南風骨折入於折楊黃荇中言偃卜
子夏文學陷入於淫靡放蕩中比肩握管動盈數千百
人數千百人筆下動成數千萬言不知其為謬誤日日
以縱自然殘藤命易其桑葉波波頽沓未見止息如此
則綺文妄言輩誰非書剡紙者耶紙工嗜利曉夜斬藤
以鬻之雖舉天下為剡溪猶不足以給況一剡溪者耶
以此恐後之日不復有藤生于剡矣大抵人間費用苟
得著其理則不枉之道在則暴耗之過莫有橫及於物

物之資人亦有其時時其斬伐不謂天閼予謂今之錯
為之文者皆天閼剡溪藤之流也藤生有涯而錯為文
者無涯無涯之損物不直於剡藤而已予所以取剡藤
以寄其悲

周朴謝友人惠箋紙并筆

范陽從事獨相憐見惠霜毫與彩箋三副緊纏秋月兔
五般方剪蜀江烟宵微覺有文通夢日習慙無子諒篇
欲着不將兩處用歸山間向墨池前

段成式與溫庭筠雲藍紙絕句并序

一日辱飛卿九寸小紙兩行親書云要采箋十幡錄少
詩為予有襍箋數角多抽揀與人既玩之輕明復用殊
麻滑尚愧大庾所得猶至四百枚豈及右軍不節盡付
九萬幅因知碧硯棋上重翻懊惱之辭紅方絮中更擬
相思之曲固應桑根作本藤角為封古拙不重蔡侯新
樣偏饒桓氏何啻奔墨馳騁有貴長簾下筆縱橫偏求
側理所恨無色如鴨卵狀如馬肝稱寫璇璣且題裂綿

者予在九江出意造雲藍紙既乏左伯之法全無張永
之功輒分五十枚并絕句一首或得間中暫當藥餌也
三十六鱗充使時數番猶得裏相思待將袍襖重抄了
盡寫襄陽播搭詞

文嵩好時侯楮知白傳

楮知白字守玄華陰人也其先隱居商山入百花谷因
谷氏焉幼知文多為高士之首冠自以村散不仕殷太
戊失德於時與其友桑同生入朝直諫拱於庭七日太

戊納其諫而修德以致聖敬日躋因賜邑於楮其後遂為楮氏二十二代祖支因後漢和帝元興中下詔徵岩穴隱逸舉賢良方正之士中常侍蔡倫搜訪得之於耒陽貢於天子天子以其明白方正舒卷平直詩所謂周道如砥其直如矢者也用遣史官以代簡冊尋拜治書侍御史奉職勤恪功業昭著帝用嘉之封好畤侯其子孫世修厥職累代襲爵不絕博好藏書尤能編繕自有文籍以來經誥典策及釋道百氏之書無不載之素幅

遇其人則舒而示之不遇其人則卷而懷之終不自矜
其該博晉宋之世每文人有一篇一詠出於人口者必
求之繕寫于是京師聲價彌高皆以文章貴達歷齊梁
陳隋以至今朝廷益甚見用之白為人好薦賢汲善能
染翰墨與人鋪舒行藏申冤雪恥呈才述志啓白公卿
台輔以至達於天子未嘗有所難阻隱蔽歷落布在腹
心何祇於八行者歟知白家世自漢朝迄今千餘載奉
嗣世官功業隆盛簿籍圖詩布於天下所謂日用而不

知也知白以為不失先人之職未嘗輒伐其功與宣城
毛元銳燕人易元光南越石虛中為相須之友每所歷
任未嘗不同知白自國子受牒補主簿直弘文館為書
吏所賂因潤而墜之當軸素知廉潔憐而不問他日方
戕而用之是以其道益光曾無背面累官中書舍人史
館修撰直筆之下善惡無隱明天子御宇海內無事志
於經籍特命刊校集賢御書書成奏之天子執卷躬覽
嘉賞不已因是得親御案乃復嗣爵好時侯

史臣曰春秋有楮師氏為衛大夫乃中國之華族也好
時侯楮氏蓋上古山林隱逸之士莫知其本出然而功
業昭宣其族大盛為天下所用利矣世世封侯爵食不
亦宜乎

文房四譜卷四

欽定四庫全書

文房四譜卷五

宋 蘇易簡 撰

墨譜

一之敘事

二之造

三之雜說

四之辭賦

一之敘事

真誥云今書通用墨者何蓋文章屬陰墨陰象也自陰顯于陽也

續漢書云守宮令主御墨

漢書云尚書令僕丞郎月賜墮麋大墨一枚小墨一枚
東宮故事皇太子初拜給香墨四丸

釋名曰墨者晦也言似物晦黑也

陸士龍與兄書云一日上三臺曹公藏石墨數十萬斤
然不知凡頗見之否今送二螺

古有九子之墨祝婚者多善禱之像也詞曰九子之墨
成於松烟本姓長生子孫無邊

顧微廣州記曰懷化郡掘塹得石墨甚多精好可寫書
今山中多出朱石亦可以入朱硯中使

戴延之西征記曰石墨山北五十里山多墨可寫書故
號焉盛弘之荊州記曰筑陽縣亦出

揚雄詔令尚書賜筆墨觀書石室

墨藪云凡書先取墨必廬山之松烟代郡之鹿角膠十
年之上強如石者妙

周書有涅墨之形莊子云舐筆和墨晉公墨縑色宰墨

綬是知墨其來久矣

陶侃獻晉帝牋紙三千枚墨二十九皆極精妙

王充論衡云以塗傳泥以墨點繒孰有知之清受塵白取垢青蠅之汚常在絹素

歐陽通每書其墨必古松之烟末以麝香方可下筆

許氏說文云墨者墨也字从黑土墨者烟煤所成土之類也

古人灼龜先以墨畫龜然後灼之兆順食墨乃吉尚書

洛誥云惟洛食漢文大橫入兆即其事也

北齊朝會議諸郡守勞訖遣陳土宜字有謬誤及書跡
濫劣者必令飲墨水一升見開寶通禮

酈道元注水經云鄴都銅雀臺北曰水井臺高八尺有屋
一伯四十間上有冰室數井井深十五丈藏冰及石墨

馬石墨可書

又見陸雲
與兄書云

括地志云東都壽安縣洛水之側有石墨山山石盡黑
可以書疏故以石墨名山

新安郡記云黟縣南一十六里有石嶺上有石墨土人多採以書有石墨井是昔人採墨之所今懸水所淙激其井轉益深矣

陳留耆舊傳云王邯剛猛能解槃牙破節目考驗楚王英謀反連及千餘人事竟引入詰問無謬一見賜御筆墨再見賜佩帶三見除司徒西曹屬

王充論衡云河出圖洛出書此皆自然也天安得筆墨而圖畫乎

晉令治書令史掌威儀禁令領受寫書緋帛筆墨
筆陣圖以筆為刀稍墨為鏐甲

二之造

韋仲將墨法曰

即韋誕也

今之墨法以好醇松烟乾搗

以細絹篩於缸中篩去草芥此物至輕不宜露篩慮飛
散也烟一斤已上好膠五兩浸梲皮汁中梲皮即江南
石檀木皮也其皮入水綠色又解膠并益墨色可下去
黃雞子白五枚亦以真珠一兩麝香半兩皆別治細篩

都合調下鐵臼中寧剛不宜澤搗三萬杵杵多益善不得過二月九月溫時臭敗寒則難乾每錠重不過二兩故蕭子良答王僧虔書云仲將之墨一點如漆

冀公墨法松烟二兩丁香麝香乾漆各少許右以膠水搜作挺火烟上薰之一月可使入紫草末色紫入秦皮末色碧其色俱可愛

昔祖氏本陽定人唐時墨官也今墨之上必假其姓而號之大約易水者為上其妙者必以鹿角膠煎為膏而

和之故祖氏之名聞於天下今太行濟源王屋亦多好
墨有圓如規亦墨之古製也有以枯木烟為之者尤麤
又云上黨松心為之尤佳突之末者為上

江南黥歙之地有李廷珪墨尤佳廷珪本易水人其父
超唐末流離渡江覩歙中可居造墨故有名焉今有人
得而藏于家者亦不下五六十十年蓋膠敗而墨調也其
堅如玉其紋如犀寫踰數十幅不耗一二分也

墨或堅裂者至佳凡收貯宜以紗囊盛懸於透風處佳

造朱墨法上好朱砂細研飛過好朱紅亦可以榨皮水
煮膠清浸一七日傾去膠清於日色中漸漸漉之乾濕
得所和如墨挺於朱硯中研之以書碑石亦須二月九
月造之

宋張永涉獵經史能為文章善隸書又有巧思紙墨皆
自造上每得永表輒執玩咨嗟久之嘆供御者不及也
造麻子墨法以大麻子油沃糯米半碗強碎剪燈心堆
于上燃為燈置一地坑于中用一瓦鉢微穿透其底覆

其焰上取烟煤重研過以石器中煎煮皂莢膏并研過者糯米膏入龍腦麝香秦皮末和之搗三千杵搜為挺置蔭室中俟乾書於紙上向日若金字也秦皮陶隱居云俗謂之樊榭皮以水漬和墨書色不脫故造墨方多用之

近點歛間有人造白墨色如銀迨研訖即與常墨無異即未知所製之法

三之雜說

張芝臨池書水盡墨

神仙傳云班孟能嚼墨一噴皆成字盡紙有意義

王子年拾遺云張儀蘇秦同志傭力寫書行遇聖人之
文無題記則以墨畫掌及股裏以記之

葛洪好學自伐新買紙墨

災祥集曰天雨墨君臣無道讒人進

神仙傳漢桓帝徵仙人王遠遠乃題宮門四百餘字帝
惡而削之外字去內字復見墨皆入木裏

揚雄答劉歆書云雄為郎自秦心好沈博絕麗之文願
不受三歲俸且休脫直事之繇得肆心廣意成帝詔不
奪俸令尚書賜筆墨得觀書于石室故天下上計孝廉
及內郡衛卒會者雄常把三寸弱翰費油素四尺以問
其異語歸則以鉛摘次之于槧二十七年于茲矣

偽蜀有童子某者能誦書孟氏召入甚嘉其穎悟遂錫
之衣服及墨一丸後家僮誤墜於庭下盆池中後數年
重植盆中荷芰復獲之堅硬光膩仍舊或云僖宗朝所

用之墨餘者

唐王勃為文常先研墨數升以被覆面謂之腹藁起筆

下不休

幼常夢人遺之墨丸盈袖

西域僧書言彼國無硯筆紙但有好墨中國者不及也云是雞足山古松心為之僕嘗獲貝葉上有梵字數百墨倍光澤會秋霖為窓雨濕因而揩之字終不減

後周宣帝令外婦人以墨畫眉蓋禁中方得施粉黛

漢書光武起王莽令以墨汙渭陵延陵周垣

僕將起赴舉年夢今上臨軒親賜墨一挺僕因蹈舞拜受旦日言於座客有江表郭靖前賀曰必狀元及第僕詰之郭曰僕有徵方言也前春御試果冠羣彥而郭公已有他事遁歸江表後言之于禮部郎中張洎洎曰夫墨者筆硯之前用時必須出手矣手與首同音也僕亦解之曰天子手與文墨也

顧野王與地志曰漢時王朗為會稽太守子肅隨之郡住東齋中夜有女子從地出稱趙王女與肅語曉別贈

一丸墨肅方欲注周易因此便覺才思開悟

抱朴子友人玄伯先生以濡墨為城池以機軸為干戈
汲太子妻與夫書曰并致上墨十螺

葛龔與梁相書曰復惠善墨下士難求推骸骨碎肝膽
不足明報

千寶搜神記曰益州西有祠自稱黃石公人或饋紙筆
一丸墨則石室中言吉凶

本草云墨味辛無毒止血生肌膚合金瘡散主產後血

暈磨醋服之亦主瞋目物芒入目點瞳子上又止血痢及小兒客忤搗篩和水調服之好墨入藥粗者不堪

陶隱居云樊槻皮水漬以和墨書色不脫即秦皮也

陶隱居云烏賊魚腹中有墨今作好墨用之

烏賊者以其食烏也

海人云烏賊魚即秦王筭袋魚也昔秦王東遊棄筭袋於海化為此魚形一如筭袋兩帶極長墨猶在腹人捕之必噴墨昏人目也其墨人用寫券歲久其字磨滅如空紙焉無行者多用之

國語晉成公初生夢人規其臀以墨曰使有晉國三世故名黑臀

潁川荀濟與梁武有舊而素輕梁武及梁受禪乃入北嘗云會於脣鼻磨墨作文檄梁

今常侍徐公鉉云建康東有雲穴西山有石墨親常使之又云幼年常得李超墨一挺長不過尺細裁如筋與其愛弟錯共用之日書不下五千字凡十年乃盡磨處邊際有刃可以裁紙自後用李氏墨無及此者超即廷

珪之父也

唐末陶雅為歙州刺史二十年嘗責李超云爾近所造墨殊不及吾初至郡時何也對曰公初臨郡歲取墨不過十挺今數百挺未已何暇精好焉

山中新伐木書之字即隱起他日洗去墨字猶分明又書於版牘歲久木朽而字終不動蓋烟煤能固木也亦徐常侍言

今之小學者將書必先安神養氣存想字形在眼前然

後以左手研墨墨調手穩方書則不失體也又曰研墨如病益重其調勻而不泥也又曰研墨要涼涼則生光墨不宜熱熱則生沫益忌其研急而墨熱又李陽冰云用則旋研無令停久久則墨埃相汚膠力隳亡如此泥鈍不任下筆矣

初舉子云凡入試題目未出間豫研墨一硯蓋欲其辦事非主於事筆硯之妙者也

今之燒藥者言以墨塗紙裹藥尤能拒火

王嘉拾遺記昔老君居景室山與老叟五人共談天地之數撰經書垂十萬言有浮提國二神人出金壺器中有墨汁狀若淳漆灑木石皆成篆隸以寫之及金壺汁盡二人乃欲刳心瀝血以代墨焉五老即五天之釋也景室即太室少室也

王獻之與桓溫書扇誤為墨汚因就成一駁牛甚工曹不興畫屏風誤汚為蠅文帝以手彈之

義熙中三藏佛馱跋陀住建業謝司空寺造護淨堂譯

華嚴經堂下忽化出一池常有青衣童子自池中出與僧灑掃研墨

宋雲行記云西天磨休王斲髓為墨寫大乘經

見筆部中

石崇奴券曰張金好墨過市數蠡并市毫筆備郎寫書

趙壹非草書云十日一筆月數丸墨

見筆勢中

劉恂嶺表錄異云嶺表有雷墨蓋雷州廟中雷雨勃起人多於野中獲得石狀如礬石謂之曰雷公墨也扣之鎗鎗然光瑩可愛

典論云袁紹妻劉氏性妬紹死未殯殺其妾五人恐死者知乃髡其髮墨其面

曹毗志怪云漢武鑿昆明極深悉是灰墨無復土舉朝不解以問東方朔朔曰臣愚不足以知之可試問西域胡僧帝以朔不知難以核問後漢明帝時外國道人入來洛陽時有憶方朔言者乃試問之胡人曰經云天地大劫將盡則劫燒灰此燒之餘乃知朔言有旨

又云出幽明錄

四之辭賦

後漢李尤墨銘

書契既造研墨乃陳烟石附筆以流以仲

曹植樂府詩曰

墨出青松烟筆出狡兔翰古人成鴛跡文字有改刊

張仲素墨池賦

墨之為用也以觀其妙池之為玩也不傷其清苟變池而盡墨知功積而藝成俾夜作晝日居月諸挹彼一水精其六言或流離於崩雲之勢乍滴瀝于垂露之餘由

是變此黛色涵乎碧虛浴玉羽之翩翩忽殊白鳥濯錦
鱗之澈澈稍見玄魚自強不息克臻其極何健筆以成
文俾方塘之改色映揚鬢之鯉乍謂寓書沾曳尾之龜
還同食墨沮如斯久杳冥莫測受涅者必其淄知白者
成其黑恢弘學海輝映儒林將援毫而悅目豈泛舟而
賞心其外莫測其中莫見同君子之用晦比至人之不
炫水開而純漆重重石映而玄珪片片倘壯流而浸稻
自成黑黍之形如東門之漚麻更學素絲之變究其義

也可傳可繼豈謀樂也泳之游之恥魏國之沉沉徒開
墨井笑崑山之浩浩空設瑤池專其業者全其名久其
道者盡其美譬彼濡翰成茲色水則知游藝之徒盡以
墨池而為比

李白謝張司馬贈墨歌

上黨碧松烟夷陵丹砂末蘭麝凝珍墨精光乃堪掇黃
頭奴子雙鵝鬟錦囊養之懷袖間今日贈余蘭亭去興
來灑筆會稽山

僧齊已謝人惠墨詩

珍重歲寒烟攜來路幾十只應真典誥銷得苦磨研正
色浮端硯精光動蜀箋因君強濡染捨此即忘筌

段成式送溫飛卿墨往復書十五首

段云近集賢舊吏獻墨二挺謹分一挺送上雖名殊九
子狀異二螺如虎掌者非佳似兔支者差勝不思吳興
道士忽遇因取上章趙王神女得之遂能注易所恨隃
麋松節絕已多時上谷櫟頭求之未獲也成式述作中

躡草隸非上海若白事足以驅策詎可供成塚之硯奪
如椽之筆乎

溫答云庭筠白即日僮幹至奉披榮誨蒙貴易州墨一
挺竹山奇製上蔡輕烟色掩緇帷香含漆簡雖復三臺
故物貴重相傳五兩新膠乾輕入用猶怨於潛曠遠建
業厓羸韋曜名方即求雞木傳玄佳致別染龜銘恩加
于蘭署郎官禮備于松櫺介婦汲妻衡第所未窺觀廣
記漢儀何當著列矧又玄州上苑青瑣西垣讐字猶新

疑籤上整帳中女史每襲清香架上仙人常持縹帙得
於華近辱在庸虛豈知夜鶴頻驚殊慙志業秋地屢綰
不稱精研惟憂瘁物虛投蠟盤空設晉陵雖壞正握銅
兵王詔徒深唯磨玉硯捧受榮佩不任下情庭筠再拜
段答云昨獻小墨殆不任用籍棖之力殊未堅剛和楚
之餘固非精好既非懷化所得豈是筑陽可求況某從
來政能慚洎祖之市果自少學業愧稚川之伐薪飛卿
制肘功深碎掌

闕

倦齊奮五筆捷發百函愁中復解玄

嘲病裏猶屠墨守烟不所附抑有神乎哉
闕禮承訊忻
懌兼襟莫測疲詞難知古訓行當祇謁條訪闕疑成式
狀

溫答云昨夜安東聽倡比因追涼枺枕才敲蘭缸未艾
縹緲初解紫簡仍傳麗事珍繁摘華益瞻雖則竟山充
貢握槩堪書五丸二兩之精英三輔九江之清潤葛龔
受賜稱下士難求王粲著銘歎遐風易遠俱苞輸囿盡
入淙池遺逸皆存纖微悉舉鷄觀鵬運豈識逍遙鯢入

鮒居應嗟坎窞願承警款以牖愚蒙庭筠狀

段荅云昨更拾從土黑聲之餘自謂無遺策矣但媿井
蛙尚猶自恃醢雞未知大全忽奉毫白復新耳目重耳
誤徹謬設生慙張奐致渝研味難盡詎同王遠術士題
字入木班孟何人噴書竟紙雖趙一非草數九志徵汲
媛餉夫十螺求說肝膽將破翰荅已疲有力負之更遲
承問成式狀

溫荅云伏蒙又抒沖襟詳徵故事蒼然之氣仰則彌高

誌彼之泉汲而增廣方且驚神褫魄寧唯衿甲投戈復
素洛呈祥翠螭垂眦龜宇著象鳥英含華至于漢省五
丸武部三善仲宣佳藻既詠浮光張永研工常稱點漆
逸少每停質滑長庸常務色輕搥乃韋書知為宋畫荀
濟提兵之檄磨楯而成恩躬覆族之言削門而顯敢持
蛙井猶望鯢池不任慙伏宗仰之至庭筠狀

段荅云赫日初昇白汗四匝愁議墨陽之地嬾窺兼愛
之書次復八行盈襞交互訪伏牛之夜骨豈望登真迷

良獸之沉脂虛成不任更得四供晉主五入漢陵隱侯
辭著於麝膠葛玄術成于魚吐寧止千松政染三凡可
和僧繡獨擅之才周顒自謂無愧而已支策長望梯几
熟暇方困九攻徒榮十部齊師其遁詎教脫扁成式狀
溫荅云竊以童山不秀非鄒衍可吹簪井無泉豈耿恭
不拜墨尤之事謂以獲麟筆聖之言翻同倚馬靜思神
運不測冥搜亦有自相里而分豈公輸所削流輝精絹
假潤青泉銘著李尤書投蘇竟字憂素敗不長飛揚傳

相見貽守宮斯王研蚌胎而合美配馬滴以成章更率
荒蕪益慚疎略廷筠狀

段荅云藍染未青玄嘲轉白責羝羊以求乳擣石田而
望苗殆將壯腸豈止憎貌猶記烟磨青石黛漬幕書施
根易思號介難曉蘇秦同志傭力有而可題王隱南游
著書無而誰給今則色流琅硯光滴彩毫腹笥未緘初
不停綴疲兵怯戰惟願豎降成式狀

溫荅云驛書方來言泉更湧高同泰時富類故倉怯蒙

叟之大匪駭王郎之小賊尤有剛中巧製廟裏奇香徵
上黨之私心識長安之石炭馬黔靡用龜食難知規虞
器以成奢然梁刑而嚴罪便當壯面不獨棲毫庭筠狀
段荅云飛卿博窮典故敏給芳詞吐水千瓶有才一石
成式尺紙寒暑素所不嫻一卷篇題從來益寡竊以墨
事故實巾箱先無可謂附騏驥而雖疲遵繩墨而不跌
者忽記鄴西古井更欲探尋號略鏤盤誰當倣效況又
劇間可答但愧於子安一見之賜敢同於到憚乎陣崩

鶴唳歌怯雞鳴復將晨壓我軍望之如墨也豈勝懋居
懾處之至成式狀

溫荅云庭筠閱市無功持撾寡効大魂陣聽蝸吮傷明
庸敢撫翼驚鵬追蹤驥跡每承函素若涉滄溟亦有叢
慘尚存幾餘可記至于縗從新制既禦秦兵綬匪舊儀
仍傳漢制張池造寫蔡碣舍舒荷新淦之恩空沾子野
發治城之詔獨避元規窘類轢羹辭同格飭其為愧忤
豈可勝言庭筠狀

段荅云韞積遍尋緘筠窮索思安世篋內搜伯喈帳中
更覩沈家令之謝箋思生松黛楊師道之佳句才煥
華抑又時方得賢地不愛寶定知災祥不雨誰論穹昊
所無還介方酬鬱儀未睨羽驛沓集筆路載馳豈知石
宣之書能迷中散麻繻之語只辨光和底滯之時徵引
多誤殫筆搦紙慚怯倍增成式狀

溫荅云昨日浴蕺時光風亭小宴三鼓方歸臨出捧緘
在醒忘荅亦以蜺蜚久罄川瀆皆隕豈知元化之杯莫

能窮竭李倫之寶益更扶疎雖有翰海疊石須陽水號
烟城倥咏剩出青松惡道遺踪空留白石扇裏止餘烏
犢笄間正作蒼蠅豈敢猶彎楚野之弓尚索神亭之戟
謹當焚筆不復撻觚矣庭筠狀

段荅云問義不休攬筆即作何翅懸鼓得挺也小生方
更陪鰓尚自舉尾更搜屋火得復刀圭因記風人辭中
將書烏皂長歌行裏謂出松烟供椒掖量用百丸給蘭
臺率以六石棠梨所染滋

關

多方黎勒共和周遮無法

傅玄稱為正色豈虛言歟飛卿筆陣堂堂舌端袞袞一
盟城下甘作附庸成式狀

文嵩松滋侯易玄光傳


易玄光字處晦燕人也其先號青松子頗有材幹雅淡
清貞深隱山谷不仕以吟嘯烟月自娛常謂門生邴炎
曰余青山白雲之士去榮華絕嗜欲修真得道久不為
寒暑所侵壽且千歲然猶未離五行之數終拘有限予
漸覺形神枯槁是知老之將至矣今他日必為風雨所

躡後因子熾盛余當神化為雲氣之狀升霄漢矣其留者號玄塵生徒居黔突之上必糜膠水之契隄麋處士煎鹿角和丹砂麝香數味遺而餌之其後果然門生皆以青松子前知定數矣玄塵生餌藥得道自黃帝時蒼頡比鳥跡為文以代結繩之政玄塵便與有功焉其後子孫皆傳其術以成道易水之上遂為易氏焉玄光即玄塵曾孫也家世通玄處素其壽皆永嘗與南越石虛中為研究雲水之交與宣城毛元銳華陰褚知白為文

章濡染之友明天子重儒玄慕其有道世為文史之官
特詔常侍御案之右拜中書監儒林待制封松滋侯其
宗族蕃盛布在海內少長皆親硯席以文顯用也

史臣曰古者得姓非官族世功則多以地名為氏或爵
邑焉或所居焉松滋侯易氏蓋前山林得道人也青松
子富有春秋不顯名氏其族或隱天下名山皆避為棟
梁之用也有居太山者秦始皇巡狩至東岳因經其隱
所拜其兄弟五人為大夫焉其叅玄得道能神化者則

自易水之上後代故用為姓云



文房四譜卷五

文房四譜後序

班志有言曰小說家流千三百八十篇蓋出於稗官道途之說也孔子曰雖小道亦有可觀者焉苟至遠而不泥庶亦幾於道也矧善其事者必利其器尋其波者必計其源吾見其決洩古先之道發揚翰墨之精莫不由是四者方傳之無窮乎苟闕其一雖敏妙之士如庶頗不能將楚人也常觀茶經竹譜尚言始末成一家之說況世為儒者焉能無述哉因閱書秘府遂檢尋前志并

耳目所及交知所載者集成此譜聞之通識者識者亦
曰可故不能棄其冠序則有騎省徐公述焉敢以胸臆
之志復書於卷末云